



26. april 2019

Aqqalu C.Jerimiassen

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

Naalakkersuisunut apeqqut:

- 1. Mittarfiit pingasut maanna sananeqartussanngorput, qanoq ililluta takornarissat Ilulissanut, Nuummut Qaqortumullu isaapiluulissappata nakkutiginiarneqarnerat iliuuseqarfiginiarneqarpa Naalakkersuisunit?**
- 2. Issittup pinngortitaa innarliasuuvoq, pinngortitarput paarisinnaanerujumallugu takornarissanik ornigarneqarluartartut akitsuusersuiffigineqarnissaat siunertarineqarnerluni Naalakkersuisunit?**
- 3. Qeqertarsuup tunua angallaffioreeqaaq, Ilulissanilu imarpik qulaallugu mittarfissaq naammassippat Qeqertarsuup tunuani imaatigut silaannakkullu angallannerup nunatsinni innutaasunut innarlerneqannginnissaa qanoq Naalakkersuisunit eqqanaarniarneqarpa?**

(Inatsisartuni ilaasortaq Aqqalu C. Jerimiassen, Atassut)

Tunngavilersuut

Island ukiumininnguit iluini takornariaqarnikkut inerisaasimaqaaq, taassumalli malitsigivaattaq aqunneqarsinnaanngiusartumik isaalipiloorneri ilutigalugit pisiassat akii ulluinnarnilu inuuniarnerup ilanngulluni akitsornera. Takornariartitsiveqarneq nunatsinni annikitsuinnaq nunaqavissunik ingerlanneqarpoq, ernumanarsinnaasorlu tassaavoq nunaqqatitta isiginnaartuinnanngoratarsinnaanerat, akillu qaffariartoqqilissappata malinnaatinneqanngippata inooriaatsip ajorseriaateqaratarsinnaanera.

Issittup pinngortitaa illersorsinnaasuaannartariaqarparput aningaasarsionerussatilluta, annerusumimmi aningaasarsiorniarnaq aningaasartuutinik annerusunittaaq malitseqartarmat. Ilulissani maanna takornariaqartareeqisumi Sermermiut Pittoqqiullu qaava orningarluarneqartarput, tassanilu malunnartumik qangarniit nunataa allaaneroqaaq. Innutaasullu akileraarutaanit akilerneqassanngippata takornariarpassuarnit innarlerneqartut suleriuseqarfigineqartariaqarput piaartumik.

Ilulissat aasaanerani isaavioreeqaaq, taamaattumillu pingaartuuvoq iluamik periusissiaqarnissaq. Taannaannaanngitsorli eqqumaffigisassarivarput, Qeqertarsuup tunua angallaffiulluareeqaaq, toqqaannartumillu taaneqarsinnaavoq eqaannerpaarsuunngilluinnarmat angallanneq tamaat isigissangaanni. Ilulissanilu imarpik qulaallugu mittarfissaq naammassineqariarpat innuttaasut angallannikkut eqqugaannginnissaat pingaartuuvoq.